

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", broj 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05), člana 16. i 51. Pravilnika o licencama – Prečišćeni tekst ("Službeni glasnik BiH", broj 63/16), na sjednici Državne regulatorne komisije za električnu energiju, održanoj 27. novembra 2019. godine, donijeta je

ODLUKA

O UKIDANJU LICENCE ZA OBAVLJANJE DJELATNOSTI MEĐUNARODNE TRGOVINE ELEKTRIČNOM ENERGIJOM

1. Ukida se licenca za obavljanje djelatnosti međunarodne trgovine električnom energijom Društvu "Erdal" d.o.o. Sarajevo, registracijskog broja 05-28-12-118-19/18, izdata 23. maja 2018. godine.
2. Ova odluka stupa na snagu danom donošenja, a dispozitiv odluke bit će objavljen u "Službenom glasniku BiH" i službenim glasilima entiteta.

Obrazloženje

Licenca za obavljanje djelatnosti međunarodne trgovine električnom energijom registracijskog broja 05-28-12-118-19/18, izdata je Društvu "Erdal" d.o.o. Sarajevo Odlukom broj 05-28-12-118-19/18 od 23. maja 2018. godine, na period od 1. jula 2018. godine do 30. juna 2023. godine.

Društvo "Erdal" je 18. septembra 2019. godine, Državnoj regulatornoj komisiji za električnu energiju (u daljnjem tekstu: DERK) podnijelo zahtjev za ukidanje postojeće licence, navodeći da se nalazi u finansijskim problemima zbog nemogućnosti naplate potraživanja od svojih kupaca. Navedeni zahtjev je ocijenjen kao nepotpun jer nije izvršena uplata jednokratne naknade za njegovu obradu, propisane Odlukom o visini jednokratne naknade za provođenje postupka u skladu sa Pravilnikom o licencama ("Službeni glasnik BiH", br. 41/13 i 17/16). Stoga je DERK pozvao podnosioca da isti upotpuni, ostavljajući razuman rok za otklanjanje nedostataka zahtjeva, uz poučavanje da će se smatrati da zahtjev nije ni podnesen, ukoliko se u ostavljenom roku njegovi nedostaci ne otklone. U ostavljenom roku, a ni naknadno, Društvo nije otklonilo nedostatke podnesenog zahtjeva. Dakle, Društvu "Erdal" je bilo poznato da podnošenje nepotpunog zahtjeva za ukidanje licence i propuštanje otklanjanja nedostataka tog zahtjeva neće biti od utjecaja na dospijee njegovih daljnjih finansijskih obaveza po osnovu regulatorne naknade.

Već su sami navodi Društva o finansijskim problemima, iznijeti u zahtjevu za ukidanje licence, a naknadno i izostanak uplate jednokratne naknade po pozivu DERK-a, indicirali da je upitna njegova finansijska stabilnost. U međuvremenu su dospjele i obaveze Društva po osnovu regulatorne naknade za četvrti kvartal 2019. godine koje, takođe, nisu izmirene u propisanom roku, što je dalo dovoljno osnova DERK-u da, u skladu sa članom 51. stav 7. Pravilnika o licencama – Prečišćeni tekst ("Službeni glasnik BiH", broj 2/05), svojim aktom broj 05-14-2-335-3/19 od 9. oktobra 2019. godine, inicira postupak suspenzije izdate licence, te pokrene postupak ukidanja licence. Licenca je suspendirana Odlukom DERK-a broj 05-28-12-335-4/19 od 16. oktobra 2019. godine, uz istodobno pokretanje postupka ukidanja licence, o čemu je donesen Zaključak broj 05-28-12-335-5/19 od 16. oktobra 2019. godine.

DERK je najprije 18. oktobra 2019. godine objavio u dnevnim novinama i na svojoj internet stranici kratku obavijest za javnost, iznoseći razloge pokretanja postupka ukidanja licence, te ostavljajući rok do 25. oktobra 2019. godine za dostavljanje komentara javnosti i podnošenje zahtjeva za sticanje statusa umješšača u ovom postupku. Konstatirano je da nisu dostavljeni

komentari javnosti u vezi pokrenutog postupka ukidanja licence, niti je bilo koje lice kandidiralo svoj interes da učestvuje u postupku u svojstvu umješaka.

Sve ovo dalo je dovoljno osnova DERK-u da pristupi pripremi Nacrta odluke o ukidanju licence. Ovaj dokument je 1. novembra 2019. godine učinjen dostupnim kako Društvu "Erdal", tako i svim drugim zainteresiranim članovima javnosti, a omogućena im je i prilika da svoje komentare iznesu i na općoj javnoj raspravi održanoj 7. novembra 2019. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i na internet stranici DERK-a.

Kako Društvo "Erdal" i predstavnici javnosti nisu uzeli učešće na općoj javnoj raspravi, niti je Društvo isticalo neslaganje sa Prijedlogom odluke i u posljednjoj prilici do 20. novembra 2019. godine, po podnesku DERK-a broj 05-28-12-335-22/19, bilo je osnovano zaključiti da se prijedlog DERK-a smatra sačinjenim u skladu sa Zakonom o prijenosu, regulatoru i operateru sistema električne energije u Bosni i Hercegovini i podzakonskim aktima koji reguliraju predmetnu materiju.

Naime, indicije o upitnoj finansijskoj stabilnosti Društva "Erdal" potvrđene su izostankom izmirivanja obaveze po osnovu regulatorne naknade za četvrti kvartal 2019. godine, čije je plaćanje najkasnije do 30. septembra 2019. godine, naloženo Rješenjem DERK-a broj 05-28-12-370-7/18 od 18. decembra 2018. godine.

Nadalje, plaćanje regulatorne naknade je obaveza stipulirana tačkom 6.1. Standardnih uvjeta za korištenje licence za obavljanje djelatnosti međunarodne trgovine električnom energijom ("Službeni glasnik BiH", broj 14/16). Propuštanje izmirivanja ove obaveze već je samo po sebi razlog za ukidanje licence, kako to i propisuje odredba člana 51. stav (1) tačka b) alineja 6) Pravilnika o licencama – Prečišćeni tekst. Osim toga, izostanak plaćanja regulatorne naknade čvrst je i pouzdan pokazatelj da vlasnik licence krši i obaveze utvrđene tačkom 2.1. Standardnih uvjeta jer je prestao ispunjavati kriterij finansijske i ekonomske sposobnosti, kao jedan od općih kriterija na osnovu kojih mu je izdata licenca, što je takođe razlog za ukidanje licence, shodno članu 51. stav (1) tačka b) alineja 1) navedenog Pravilnika. Ovi razlozi su naglašavani Društvu "Erdal" u postupku suspenzije licence, ali Društvo nije nalazilo interesa da ih otkloni tokom provođenja postupka njenog ukidanja.

Izostanak finansijske stabilnosti licenciranih subjekata može imati negativne konsekvence po druge subjekte u sektoru električne energije, funkcioniranje tržišta električne energije i kvalitet snabdijevanja električnom energijom. Cijeneći prevashodno navedeno, ali ne zanemarujući finansijske implikacije izostanka plaćanja regulatorne naknade po DERK, to je na osnovu člana 51. stav (1) tačka b) alineje 1) i 6) Pravilnika o licencama – Prečišćeni tekst, odlučeno kao u dispozitivu ove odluke.

U skladu sa članom 9.2 Zakona o prijenosu, regulatoru i operatoru sistema električne energije u Bosni i Hercegovini, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema ove odluke.

Broj: 05-28-12-335-24/19

Predsjedavajući Komisije

27. novembra 2019. godine

Tuzla

Suad Zeljković